

Oko 200 radnika KHK do kraja mjeseca ide na biro

Okončali šestogodišnju agoniju

Žalosno je što idemo na biro, ali je i to bolje od dosadašnjeg stanja koje je bilo besmisleno, kazala Alihodžićeva

Maja RENER

SARAJEVO - Oko 200 radnika Koksno-he-mijskog kombinata (KHK) Lukavac za desetak dana imaće uvezan staž od 2003. godine do 30. septembra ove godine i biće upućeni na biro za zapošljavanje, a u ovom mjesecu dobiće i prve otpremnine.

Ovim je, kako je rekla predsjednica Sindikata KHK Senada Alihodžić, završena borba radnika i agonija u kojoj su se nalazili šest godina, koliko koksara ne radi, a oni su na ulici.

Dodala je da je Skupština Tuzlanskog kantona prihvatila raniju odluku Vlade o načinu rješenja statusa radnika KHK čime je zaključen staž oko 200 uposlenika ove državne firme.

"Biće nam plaćeni doprinosi za nezaposlenost kako bismo imali naknade sa biroa. Radnici još nisu odjavljeni iz firme. Treba desetak dana da se završi papirologija. Bitno je da je urađena finansijska konstrukcija. Program Vlade za zbrinjavanje radnika zadire u budžet za iduću godinu i zato je trebala saglasnost Skupštine. Sklopljeni su sporazu-



Koksara ne radi šest godina

mi sa Zavodom PIO, Zavodom za zapošljavanje FBiH i radnicima", kazala je Alihodžićeva.

Istakla je da nisu sretni, jer idu na biro, ali da je i to bolje od dosadašnjeg stanja koje je bilo besmisleno i neodrživo.

"Duže od tri godine je trajala borba da nas riješe. Završili smo je. Žalosno je što idemo na biro. Ima ovdje kvalitetnih radnika koji su na sredini radnog vijeka", rekla je Alihodžićeva.

Vlada TK pozajmiće koksari oko pet miliona KM

Napomenula je da će Vlada pozajmiti koksari oko pet miliona KM za obaveze prema radnicima, a taj novac biće vraćen prodajom udjela koji KHK ima u firmi GIKIL ili prodajom dijela imovine vrijedne ukupno 160 miliona KM. Naglasila je da će dug za PIO biti plaćen u 48 rata, dok će otpremnine dobiti u 12 rata, a prva je u oktobru. Dodaje da otpremnina iznosi 500 KM za svaku godinu staža.

"Vlada smatra da sada nije momenat da se kapital KHK privatizuje zbog recesije, a ne mogu pokrenuti proizvodnju. Sve što je vrijedilo u našoj firmi uloženo je u GIKIL. Ostao je samo neproizvodni dio i tu za nas ne bi ni bilo posla", dodala je Alihodžićeva.

Izjavu ministra industrije, energetike i rudarstva TK Sehudina Ograševića nismo juče dobili.

Studentima odobren bezuslovan upis



B. DIVLJAK

BANJALUKA - Studentima koji studiraju po starim programima odobren je bezuslovan upis naredne godine studija, s tim da svaki fakultet može da odredi koji ispiti moraju biti položeni iz prethodne godine, rekao je Stanko Stanić, rektor Univerziteta u Banjaluci.

Rektor Stanić je pojasnio da je ovim studentima uslov za bezuslovan upis redovno odslušana i ovjerena prethodna godina.

On je dodao da studenti koji studiraju po novom Zakonu o visokom obrazovanju, odnosno bolonjska generacija, mogu da upiše narednu godinu studija sa najviše 15 prenesenih ects bodova iz prethodne godine.

"Studenti onih fakulteta na kojima jedan ispit vrijedi više od 15 ects bodova moći će u narednu godinu prenijeti jedan ispit", pojasnio je Stanić.

Rektor Univerziteta u Banjaluci je rekao da su ovakvu odluku donijeli vjerujući da će ovo

biti posljednja školska godina u kojoj se na početku školske godine razgovara o prenosu ispita.

Bojan Grebenar, predsjednik Studentskog parlamenta Univerziteta u Banjaluci, rekao je da su studenti tražili da se zbog male prolaznosti na Univerzitetu u Banjaluci odobri prenos 15 ects bodova, bezuslovan upis i parcijalno polaganje ispita za studente koji studiraju po starom zakonu, ali i hitnu analizu stanja na Univerzitetu.

"Posebno se treba pozabaviti pitanjima kvaliteta rada i prolaznosti kod pojedinih profesora, nastavnih planova i programa i analizom opterećenosti studen-

Bolonjci mogu prenijeti 15 bodova, odnosno jedan ispit

ta", rekao je Grebenar.

Stanić je rekao da će rukovodstvo Univerziteta do 1. decembra analizirati kvalitet nastavnog procesa na Univerzitetu, te da će vidjeti gdje su slabosti i na kojim fakultetima.

"Insistiramo da u izmjenama i dopunama Zakona o visokom obrazovanju prenos ects bodova bude u nadležnosti visokoškolskih ustanova kako bi one to rješavale svojim statutima i pravilima studiranja", kazao je Stanić.

Nastava u zimskom semestru na Univerzitetu u Banjaluci počće 5. oktobra i trajaće do 1. februara 2010. godine.

Smanjenje prodaje voća i povrća

SARAJEVO - Na pijacama u FBiH u avgustu prodato je poljoprivrednih proizvoda u vrijednosti 4.574.171 KM, što predstavlja smanjenje za 649.097 KM u odnosu na avgust 2008, podaci su Federalnog zavoda za statistiku.

Najveće učešće u ukupnoj prodaji poljoprivrednih proizvoda na pijacama u avgustu su imali povrće, voće, mlijeko i mliječni proizvodi.

Ukupna vrijednost prodaje poljoprivrednih proizvoda vlastite proizvodnje poljoprivrednih preduzeća i zemljoradničkih zadruga i otkupa poljoprivrednih proizvoda od porodičnih poljoprivrednih proizvođača u avgustu 2009. iznosila je 12.709.480 KM, što je u poređenju s avgustom prošle godine više za 253.989 KM ili za dva odsto.

Ukupna vrijednost prodaje poljoprivrednih proizvoda vlastite proizvodnje poljoprivrednih preduzeća i zemljoradničkih zadruga u avgustu 2009. iznosi 5.522.991 KM, što je za 1.554.708 KM ili 39,2 odsto više u poređenju s avgustom 2008.

Vrijednost otkupa poljoprivrednih proizvoda od porodičnih poljoprivrednih proizvođača u avgustu iznosila je 7.186.489 KM, što je za 1.300.719 KM ili 15,4 odsto manje u poređenju s avgustom 2008. (Fena)

Bosna i Hercegovina
Federacija Bosne i Hercegovine
Unsko-sanski kanton
Općina Bihac

JU OŠ "Kulen Vakuf, Orašac
Trg žrtava 12. juna
77206 Kulen Vakuf

Na osnovu člana 135 Zakona o osnovnom i općem srednjem odgoju i obrazovanju "Službeni glasnik USK" br. 5/2004. i člana 137 Pravila JU OŠ Kulen Vakuf, Orašac Odlukom Školskog odbora JU OŠ Kulen Vakuf, Orašac br. 363/09. od 15.09.2009. godine **raspisuje se**

KONKURS

za popunu upražnjenih radnih mjesta

1. Nastavnik bosanskog jezika1 izvršilac, na 4 sata do 30.06.2010.
2. Nastavnik historije.....1 izvršilac na 4 sata do 30.06.2010.
3. Nastavnik islamske vjeronauke.....1 izvršilac na 8 sati do 30.06.2010.
4. Nastavnik likovne kulture1 izvršilac na 7 sati do 30.06.2010.
5. Nastavnik informatike1 izvršilac na 8 sati do 31.08.2010.
6. Nastavnik tehničkog odgoja.....1 izvršilac na 4 sata do 31.08.2010.
7. Nastavnik razredne nastave1 izvršilac u PŠ Klisa do 31.08.2010.
8. Nastavnik razredne nastave.....2 izvršioca u centralnoj školi na neodređeno
9. Nastavnik razredne nastave.....1 izvršilac do povratka nastavnika sa bolovanja
10. Nastavnik demokratije i ljud. prava1 izvršilac 2 sata do 30.06.2010.
11. Nastavnik matematike1 izvršilac na 12 sati do 30.06.2010.
12. Nastavnik fizike1 izvršilac na 6 sati do 30.06.2010
13. Nastavnik matematike i fizike..... 1 izvršilac na neodređeno
14. Nastavnik engleskog jezika1 izvršilac na 16 sati do 31.08.2010.
15. Nastavnik njemačkog jezika1 izvršilac na 4 sata do 30.06.2010.

Uslovi konkursa:

1. Pored općih uslova kandidati treba da ispunjavaju uslove utvrđene Zakonom o osnovnoj školi i Nastavnim planom i programom za osnovnu školu.

2. Uz prijave priložiti diplomu o završenoj školskoj spremi, izvod iz matične knjige rođenih, uvjerenje o državljanstvu i uvjerenje da se ne vodi krivični postupak, a predavači islamske vjeronauke saglasnost IVZ za rad a ljekarsko uvjerenje po konačnosti odluke o izboru.

Prijavljeni kandidati dužni su se odazvati na intervju koji će obaviti Konkursna komisija škole dana 22.10.2009. godine od 11 sati u centralnoj školi u Kulen Vakufu.

Kandidatima koji se ne odazovu na intervju, neće se izimati prijave u razmatranje. Nepotpune i neblagovremene prijave neće se uzimati u razmatranje.

Konkurs ostaje otvoren 15 dana od dana objavljivanja.

Prijave slati na adresu datu u zaglavlju.